



Datë: 30.04.2025

Numër Protokolli: 3223/2025

A.nr.317/2025

Këshilli i Pavarur Mbikëqyrës për Shërbimin Civil të Kosovës - Kolegji për Shqyrtimin dhe Vendosjen e Ankesave, në përbërje nga: Malsore Gashi-Bajraktari - kryetar, Ardita Haxhnikaj-Demi dhe Eshref Shabani-anëtare, si dhe Ylber Fetahaj në cilësinë e procesmbajtësit, ka shqyrtuar ankesën me numër A.nr.317/2025 të datës 14.02.2025 të parashtruar nga ankuesi F.Z, kundër organit të punësimit/Ministria e Punëve të Brendshme, në çështjen juridike “Shkelje e drejtës ne page”, duke vepruar në pajtim me nenin 6 paragrafin 1 nën paragrafin 1.1, nenin 16 paragrafi 3 dhe nenin 18 paragrafin 1 nën paragrafin 1.4 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, dhe Rregulloren Nr.02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, me datë 30.04.2025, mori këtë:

V E N D I M

I. Aprovohet si e bazuar ankesa A.nr.317/2025, e datës 14.02.2025, ashtu që **detyrohet** Udhëheqësi i Njesisë së Burimeve Njerëzore në Ministrinë e Punëve të Brendshme, që brenda afatit prej 15 ditësh nga dita e pranimit të këtij vendimi të shqyrtoj Kërkesës e datës 24.12.2024 të parashtruar nga ankuesit F.Z dhe të nxjerr akt administrativ në pajtueshmëri me dispozitat ligjore në fuqi.

II. Këshilli i Pavarur Mbikëqyrës për Shërbimin Civil të Kosovës, duhet të njoftohet me shkrim pas ndërmarrjes së veprimeve në pajtim me këtë vendim.

A r s y e t i m

Nëpunësi civil, F.Z (në tekstin e mëtejme referuar: Ankuesi) i punësuar në Ministrinë e Punëve të Brendshme, me datë 14.02.2025, ka parashtruar ankesë me numër protokolli 1027 të regjistruar nën shenjen Anr.317/2025 në Këshillin e Pavarur Mbikëqyrës për Shërbimin Civil të Kosovës, me pretendimin ankimor për njohjen e të drejtës në realizimin e diferencës së pagës pasi që me vendimin e datës 22.03.2022 është caktuar në detyrën e Inspektorit të ARC.

Këshilli i Pavarur Mbikëqyrës për Shërbimin Civil të Kosovës (në tekstin e mëtejme referuar: Kolegji i Këshillit) nga analizimi i shkresave të lëndës ka gjetur se ankuesi sipas Akt Emërimit të datës 31.01.2013 është punësuar në Ministrinë e Punëve të Brendshme, ndërsa lidhur me pretendimet ankimore të ankuesit të parashtruara si në ankesë në drejtim të kompensimit të diferencës në pagën ankuesi pretendon se me Vendimin e datës 22.03.2022 është caktuar në pozitën e Inspektorit të ARC dhe i njëjti nuk është paguar diferenca në pagës, mirëpo nga

analizimi i shkresave të lëndës rezulton se i njëjti nga organi përkatës i punësimit përkundër kërkesës se datës 24.12.2024, nuk ka pranuar përgjigje me shkrim dhe nuk ka pranuar as një sqarim në lidhje me kërkesën e tij.

Kolegji i Këshillit, ndërlidhur me rregullat e veprimeve procedurale të një organi publik, ju referua dispozitave të Ligjit Nr.05/L-031 për Procedurën e Përgjithshme Administrative (tutje referuar: LPPA), përkatësisht nenit 10 paragrafi 2 ku përcaktohet se: 2. *Organi publik zhvillon procedurën administrative sa me të shpejtë dhe me sa më pak shpenzime, për të dhe për palën, duke mos cenuar çfarë është e nevojshme për një rezultat të ligjshëm e të përshtatshëm të procedurës administrative, nenit 98 paragrafi 1 dhe 2 ku përcaktohet se: 1. Procedura administrative nisur sipas kërkesës, do të përfundojë sa më shpejt që të jetë e mundur, por jo më vonë se sa afati i përcaktuar me ligj të veçantë për atë lloj procedure. 2. Në rast se ligji i veçantë nuk ka paraparë një afat, siç është paraparë në paragrafin 1 të këtij neni, afati i përgjithshëm i zbatueshëm për përfundimin e procedurës administrative është dyzetepesë (45) ditë nga fillimi i saj, si dhe nenit 97 paragrafi 1 të këtij ligji, ku përcaktohet se: 1. Një procedurë administrative e nisur sipas kërkesës, përfundon me njoftimin e një akti administrativ apo lidhjen e një kontrate administrative, dhe si rrjedhojë në kuptim të këtyre dispozitave ligjore si dhe bazuar në shqyrtimin e provave materiale të çështjes, Kolegji i Këshillit konstatoi se organi përkatës i punësimit, në rrethanat e rastit konkret, nuk ka vepruar në pajtueshmëri me dispozitat përkatëse ligjore, në raport me Kërkesën e datës 24.12.2024, të parashtruar nga ankuesi, ngase sipas bazës ligjore si me sipër, vullneti i organit publik në realizimin e autoritetit publik formësohet në procedurë administrative dhe manifestohet në formën e njërit prej veprimeve administrative, siç janë: akti administrativ; kontrata administrative apo akti real, dhe se në vlerësimin e Kolegjit, organi përkatës i punësimit, në kuadër të autorizimeve të përcaktuara me legjislacionin në fuqi, është dashur që të nxjerr akt administrativ në kuptim të vendosjes dhe të njoftoj palën për aktin e tillë, brenda një afati prej 45 ditësh sikurse përcaktohet me nenin 98 paragrafi 2 apo afatit të vazhduar sipas nenit 99 paragrafi 1 të LPPA-së.*

Rrjedhimisht, në vlerësimin e Kolegjit të Këshillit, heshtja e organit të administratës, në këtë rast, zyrtarit përgjegjës të burimeve njerëzore të Ministrisë së Punëve të Brendshme, në raport me ankuesin, gjegjësisht Kërkesën e datës 24.12.2024, cenon të drejtat e ankuesit në kuptimin e të drejtave procedural dhe për rrjedhojë edhe vendosjes në mënyrë meritore, ngase ashtu sikurse është thënë në arsyetim të këtij vendimi, në kërkesën e parashtruar të organi i punësimit, ankuesi kërkon realizimin e një të drejte sikurse është e drejte e pagese se diferencës në pagë dhe se organi i punësimit ka qenë i obliguar të trajtoj kërkesën e tij të datës 24.02.2024 dhe të nxjerr akt administrativ në pajtueshmëri me dispozitat e Ligjit Nr.05/L-031 për Procedurën e Përgjithshme Administrative.

Kështu që thënë si me sipër e duke u bazuar në nenin 18 paragrafin 1 nën paragrafin 1.4 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, Kolegji i Këshillit vendosi të aprovoj si të bazuar ankesën e datës 14.02.2024, në kuptim të shkeljeve procedurale, dhe si rrjedhojë detyroj zyrtarin përgjegjës të burimeve njerëzore, gjegjësisht Udhëheqësin e Njesisë së Burimeve Njerëzore të Ministrinë e Punëve të Brendshme që në respektim të dispozitave procedurale të shqyrtoj Kërkesën e datës 24.12.2024, dhe të nxjerr akt administrativ në përputhshmëri me dispozitat ligjore në fuqi.

Këshillë Juridike: Vendimi hyn në fuqi në ditën e nënshkrimit nga Kryetari i Kolegjit. Pala e pakënaqur, e cila pretendon se vendimi i Këshillit nuk është i ligjshëm, mund të iniciojë konflikt administrativ në Gjykatën Themelore në Prishtinë/Departamenti për Çështje Administrative, brenda afatit prej tridhjetë (30) ditësh, nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij vendimi.

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
Lënda A.nr.317/2025

Ylber Fetahaj

Procesmbajtës

Malsore Gashi Bajraktari

Kryetare e Kolegjit

Vendimi i dërgohet:

- Ankuesit; F.Z;
- Udhëheqësit të Burimeve Njerëzore në Ministrinë e Punëve të Brendshme; dhe
- Arkivit të KPMSHCK-së.